

Miho graduado di Trayecto Formacion Social Umberto Schmidt

El a siña con cana su caminda cu respet



Umberto Schmidt e miho graduado di Formacion Social.

ORANJESTAD- Para banda di su mama superorguyoso, Umberto Schmidt, e curista di e di dos grupo cu a termina e trayecto Formacion Social como e miho graduado, a bisa di ta mira bek riba un aña cu no tabata facil, pero si un aña den cual el a siña hopi. “Mi a siña con cana mi caminda cu respet”. Schmidt a logra di tabata tambe e hoben cu mas a destaca den e periodo di 4 luna na Marinierskazerne.

“Mi kier tabata e ehempel pa mi compañeronan. Mi a percura pa comporta mi mes bon. Semper yega tempran y semper presenta na mi stage”. Schmidt a bisa di ta hopi satisfecho cu e proyecto y tambe cu el a logra haya su certificado. Awor e ta sigui cu e siguiente paso den su bida. Un trabou

pa gana su pan. “Mi ta bezig cu un trabou cu mi a aplica p’e. Otro siman mi ta bay haci un test psicologico pa haya e trabou aki. Mi ta spera di haya e trabou aki”. Ora e hobennan drenta e trayecto nan ta haya nan mes confronta cu hopi cambio na mes momento.

Mester keda drumi den kazerne, lanta tempran y haci hopi ehercicio. Pa Schmidt e parti mas duro di e trayecto tabata e parti aki. “E prome lunanan, ora mi a drenta kazerne, mi tabata gordo. Pesey core y haci ehercicio tabata duro pa mi dor di mi sobre peso. Mi a cuminsa cu un diet y bahando peso mi curpa a bira mas lihe di moda cu mi por a move mas miho tambe”. Mama di Umberto a bisa di ta

hopi contento y tambe agradecido na Prome Minister Mike Eman. “Mi tin pidi Dios pa bendicion’e. Tambe mi ta yama danki nan tur cu a traha cu mi yiu y e otro hobennan pa nan tin un miho futuro y sigui padilanti”.

Pa otro hobennan cu ta den e mesun situacion cu e tabata Schmidt tin un bon conseho. “Nunca ta lat. Tin un di dos oportunidad pa bo eyfo. Ta pesey e programa aki ta. Nunca give up, purba di bay dilanti y logra mescos cu ami a logra haya mi certificado cu e posibilidad di un bon trabou den futuro”.

Umberto Schmidt ta wardando contesta riba mas di un trabou. El a baha 22 kilo y a keda mantene su peso. □